

The Remnant Of Her Seed ----Masalela

<https://theremnantofherseed.com/>

A. Lesiapeto

“Bojalwa ke mosoti” Diane 20:1

Mofine o o sa belang- Matute a moretlwa wa Sekgowa

Lefoko la mofine kgotsa “moweine” jaaka le ranotswe go tswa ko temeng ya Sehebera le ya Segerika mo Baebeleng ya Setswana ya 1970 le raya matute a moretlwa wa Sekgowa, ke gore mofine o o sa belang, ga se bojalwa.

“Go bua Jehofa a re : E a re fa go fitlhelwa matute a moweine (tiyrowsh) mo lesitlheng, go tse: Se le senye, gone lesego le mo go lone.” Isaia 65:8. Testamente e Kgologolo e kwadilwe ka Sehebera, mme lefoko le le dirisitsweng la moweine ke “tiyrowsh” kgotsa “tee-rosh” mo temaneng e, lefoko le, le dirisitswe ga 38, le raya moretlwa wa Sekgowa. Ka jalo ga se mofine o o bedileng. O ka jewa kgotsa wa nowa o ntse fela jalo. Mofuta wa mofine o, ga se o o tagang, mme ke lesego go tswa ko Modimong jaaka re utlwa mo temaneng.

Sekai se sengwe ke temane e e reng, “Ke go file diabe tsa lookwane lo lontle le tsa matute a moweine a a monate otlhe le tsa mabele a pila otlhe, e bong tse di gaisang ka molemo tsa tsona, tse ba di neeleng Morena” Dipalo 18:12. Ka gore ke matute a moretlwa, a kgona go abilwa Modimo ke Baperesiti, ga se bojalwa.

Ha gongwe bakwadi ba Mahebera ba dirisa lefoko le le tlwaelesegileng la “yayin” gore raya mofine o o sa belang , kotsa o o bedileng, se e leng bojalwa. Ka jalo fa “yayin” a dirisitswe, re tshwanetse ra ela tlhoko gore go buiwa ka eng. Jaaka temana e e latela, go dirisitsweng “yayin”:

“Go tlositswe boitumelo le lethabo mo tshimong; ga ba duduetse le e seng go ipela mo masimong a moweine (yayin). Mogati ga a gate maungo a moweine mo digatelong. Ke tlositse mogolokwane.” Isaia 16:10. Mafoko a, a bua ka moweine e le maungo a tsenngwang mo dikgatelong go dira seno, o sa bedisiwa, ka jalo ga se bojalwa.

“Matlho a me a thibilwe ke dikeledi, mo teng ga me go a huduega, ke phatlogile pelo ka ntlha ya go thubakannngwa ga morwadia morafe wa me; le ka go timelela ga bana le masea mo dipatlelong tsa motse. Ba lelela mo go bommabo ba re: ‘Bogobe bo kae le mofine (yayin) o kae?’” Dikhutsafalo 2:11,12. Temana e e bua ka moweine kgotsa mofine o o ka nowang ke bana, ka jalo ga se bojalwa.

Mofine o o bedileng- Bojalwa

“Weine (yayin) ke mosotli, bojalwa ke motsosa-lorata; le fa e le mang yo a timelang ka jone ga a botlhale” Diane 20:1. E ke “weine” kgotsa mofine o o bedileng, se e leng bojalwa, mme o ama tlhaloganyo le botsogo ka mo go sa siamang, ka jalo ba ba o nwang ga ba botlhale.

“A tatlhego ya bone ba ba phakelelang go batla bojalwa, le ba ba nnetseng weine (yayin) e e ba tlhapelang go ya gare ga bosigo” Isaia 5:11. Temana e e bua ka weine kgotsa mofine o sa siamang ka gore Baebele ya re ba ba o nwang ba latlhegile.

“A kampo ga lo itse gore basiamolodi ga ba kitla ba rua puso ya Modimo? Se tsietsegeng; le fa e le diaka kgotsa baobamedi ba medimo ya disetwa, kgotsa ba bonyatsi, kgotsa banna ba ba robalang le banna ba bangwe, kgotsa magodu, kgotsa ba ba bohula, kgotsa **matagwa**, kgotsa bakgadi, kgotsa dinokwane, ga go ope wa bone yo tla ruang bogosi jwa Modimo ”1 Bakorinthe 6:9,10. Ditemane tse di supa fa matagwa ba le mo palong ya ba ba sa kakeng ba rua bogosi jwa Modimo. Di supa gore go nwa bojalwa ke boleo.

Keresete o fetola metsi go nna mofine

Bangwe ba supa fa go nwa bojalwa e se boleo ka gore Jeso o ne a fetola metsi go nna mofine ko lenyalong la Kana, mme a fa batho gore ba nwe (Johane 2:1-10).

Keresete ke e ne a fileng Isaraele mo testamenteng e kgologolo tlhagiso ya gore, “Mofine ke mosotli, bojalwa ke motsosa-lorata” Diane 20:1. Ka jalo ga a kake a fa batho seno se se sotlang. Satane ke ene a o raelang batho gore ba nwe seno se se tla tisang tlhaloganyo ya bone mo seemong se se sotlang, mme Keresete o re ruta gore re tshwanetse ra laola megopolo le mokgwa ya rona ka nonofo ya Gagwe. Botshelo ja Gagwe jotlhe e ne e le botshelo ja go ikitsa bonna. Gore a kgaole nonofo ya keletso ya dijo, O ne a itshokela teko e e bogisang mo beemong ja rona, e motho o neng a sa kake a e kgona.

Ke Keresete yo o laetseng Johane wa mokolobetsi gore a seka a nwa mofine o o loileng le fa e le seno se se tagang, “Ga a nke a nwa weine, le fa e le seno se se tagang, mme o tla tlala Mowa o o Boitshepo go tloga sebopele sa ga mmagawe” Luke 1:15.. Ke Keresete gape yo a boleletseng mosadi wa ga Manoa gore a seka a nwa mofine o o bedileng (Baatlhodi 13:14). Keresete ga a kake a ganetsa kgotsa a bua se se pharologanyo le se a se buileng. Mofine o o sa belong ke one a o fileng batho ko lenyalong.

“Ga gona sepe se kwa ntle ga motho se se ka mo itshekololang” Mareko 7:15

Bangwe ba re mafoko a builweng ke Jeso a fa godimo, a supa gore bojalwa bo ka nowa ka gore bo tswa kwa ntle ga motho. Mme se ga se sone se Jeso a neng se raya. O ne a re, “Mo teng, mo dipelong tsa batho, go tswa megopolo e e bosula, le dikgokafalo, le bogodu, le dipolao, le boaka, le bopelotshetlha....dilo tse tsotlhe di tswa mo teng, mme di itshekolola motho” Mareko 7:21

Go dira bosula go simologa mo pelong, mo tlhaloganyong, mo teng ga motho, ga e simololwe ke sepe se se tswang kwa ntle. Ka ko ntle, matlho a rona a ka bona dilo tse di ntsi tse di ka re raelang gore re dire bosula. Go bo go tswa mo go rona gore a re tla laolwa ke se re se bonang kgotsa se re se utlwang, kgotsa se re se nkgang go dira bosula. Mme fa re ikanya mo nonofong ya ga Keresete ya go tlabana le tlhalelo, dilo tse tsotlhe ga di kake tsa re fenyana gore re felele re dirile bosula. Ka jalo dipelo tsa rona ga di na go nna le dikakanyo tse dibosula tse di itshekologang motho. Gore motho a felele a nwa bojalwa kgotsa, kgotsa a goga motsoko, a dira boleo bope fela, o tshwanetse pele kakanyo ya tswa pelong. Ke sone se Jeso gape o ne a bua a re “Mongwe le mongwe yo o lebang mosadi ka go mo eletsana, o setse a dirile boaka nae mo pelong” Mathaeo 5:28. Motho yo o molato ka gore o leba ka go eletsana, ka gore mo pelong ya gagwe o na le keletso kgotsa kakanyo ya go dira boaka.

Nonofo mo go Jeso Keresete

Go na le nonofo mo mading a ga Jeso Keresete go re kgontsha rona batho ba re senang nonofo go fenyana ditshokamelotse tsa rona tsa tlholego tsa go rata go leofa. Baebela e tlhalosa seemo sa rona sa tlholego ka mafoko a, “ka maikutlo a senama e le bobaba le Modimo; gone ga a laolwe ke molao wa Modimo” Baroma 8:7

Ka mafoko a mangwe, lebaka tota le rona batho re batlang go nwa bojalwa kgotsa go dira boleo bope fela, ke gore “maikutlo a senama”, ditshokamelotse tsa rona tsa tlholego di batla se Modimo a sa se batlang. Fa re sa letelele Modimo ka Mowa wa Gagwe o o Boitshepo go fetola “maikutlo a senama” go re a nne a a laolwang ke molao wa Modimo, ga go kgatlhalesege gore re ntsha ditemana di le kae go supa gore Modimo ga a batle bojalwa, re tla tswelela re nwa bojalwa go fitlhela re senngwa mo lekadibeng la molelo

Keresete o ne a tla mo lefatsheng go boloka baleofi. Ga go kgatlhalesege gore ke boleo bofe jo Satane a go bofileng ka jone, e kwa tswa e le botagwa, boaka, boikgodiso, kana bope fela. Fa re innela mo go Jeso Keresete, re mo amogela jaaka Mmoloki wa rona, re ikotlhaela maleo a rona, re ipolela maleo a rona, tsholefetso ya Baebela ke gore, “O boikanyo le tshiamo go re itshwarela maleo a rona, le go re tlhatswa mo tshiamololong yotlhe”, le gore “Botlhe ba ba mo amogelang, ba ba dumelang mo ineng la Gagwe, o ba fa nonofo ya go nna bana ba Modimo” 1 Johane 1:9; Johane 1:12.

Ka jalo nonofo e teng mo go Jeso go kgaogana le boleo le bokgoba ja ga Satane. Mo apostolo Paulo a re “Tsotlhe ke di kgona ka ene yo o nthatafatsang, e bong Keresete” Bafilipi 4:13. Se ke tiro ya tsatsi le letsasti, ka gore tsholefetso e nngwe ya Modimo ke gore “Jaaka malatsi a gago a ntse, thata ya gago e tla nna fela jalo” Diteronome 33:25